



**ATASSUT**

**Steen Lynge**

**UKA 2016/97**

**07. 10. 2016**

**Siunissamut isigaluni pisariaqartitat aallaavigalugit ulluunerani paaqqinnittarfinni atorfinitsitsinernut, ilinniartitaanernut, pikkorissaqqinnernut ilinniarsimasunillu sulisunik attatiinarsinnaanermik qulakkeerinninnissaq siunertalaralugu UPA 2017-imi periusissanut iliuuserisaassanullu pilersaarummik saqqummiussinissamik Naalakkersuisut peqquneqarnissaannik Inat-sisartut aalajangiiffigisassaannik siunnersuut.**

(Inatsisartunut ilaasortaq/Medlem af Inatsisartut Peter Olsen, Inuit Ataqatigut)

Atassut-mit siunnersuuteqartoq, upernaanerani 2017-imi Inatsisartut ataatsimiinnissaannut sulisut atuuttut pillugit periusissanut iliuuserisaassanullu pilersaarummik saqqummiussinissamik Naalakkersuisut peqquneqarnissaannik Inatsisartut aalajangiiffigisassaannik siunnersuutaanut qutsavigissavarput.

Meeqqat inuusuttullu pitsaasunik avatangiiseqarnissaannik qulakkeerinnittooqassappat, pingaruteqarpoq – illut pineqarpata imaluunniit sulisutigut pineqarpata – avatangiisit pingeqartut pitsaassutsimikkut qaffasisumik inisisimanissaat. Avatangiisit pitsaasuugaangata, meeqqat inuusuttuaqqallu toqqisisimanissaat aammalu ilinniarusussusaat pitsaasumik sinaakkuserneqartarpoq, meeqqamut aammalu inuusuttuaqqamut iluaqutaasumik.

Tamannalu qulakkeerneqassappat pisariaqarpoq, sulisut ulluinnarni sulifimminni atugarisaat aammalu ilinniartitaanerat malinnaaviguassallugu.

Naalakkersuisut akissuteqarnerminni siunnersuutigineqartoq isumaqtigaat, taamaattorli siunnersuutigineqartoq pitsaasumik naammassineqaqqullugu, kissaatigaat kommunit, sulisut aammalu allat susassaqartut suliassamut peqataatilluarnissaat. Taamaammat allannguutissatut siunnersuutigaat Naalakkersuisut suliap naammassinera Inatsisartunut 2017-imi ukiaanerani saqqummiunneqassasoq.

Tamanna tunngavigalugu Atassut-mit siunnersuut akuersaartumik ilalissavarput allannguutissatut siunnersuutigineqartoq ilanngullugu.